



Broj: 02-05-1104-1/12
Sarajevo, 11.04.2012. godine

Na osnovu čl. 22. i 24. stav 4. Zakona o Vladi Kantona Sarajevo ("Službene novine Kantona Sarajevo", broj: 24/03 - Prečišćeni tekst), Vlada Kantona Sarajevo, na **65.** sjednici održanoj **11.04.2012.** godine, donijela je sljedeći

ZAKLJUČAK

1. Utvrđuje se Prijedlog zakona o dopuni Zakona o dopunskim pravima boraca-branitelja Bosne i Hercegovine.
2. Predlaže se Skupštini Kantona Sarajevo da prihvati Prijedlog zakona iz tačke 1. ovog Zaključka i da ga u skladu sa članom 152. Poslovnika Skupštine Kantona Sarajevo ("Službene novine Kantona Sarajevo", br. 25/10) pretrese po skraćenom postupku.

PREMIJEER

Fikret Musić

Dostaviti:

1. Predsjedavajuća Skupštine Kantona Sarajevo
2. Skupština Kantona Sarajevo
3. Premijer Kantona Sarajevo
4. Ministarstvo za boračka pitanja
5. Evidencija
6. Arhiva



web: <http://vlada.ks.gov.ba>
e-mail: premijer@ks.gov.ba;
Tel: + 387 (0) 33 562-068, 562-070
Fax: + 387 (0) 33 562-211
Sarajevo, Reisa Džemaludina Čauševića 1



Na osnovu člana 18. stav 1. tačka b) u vezi sa čl. 12, 13. i 14. Ustava Kantona Sarajevo ("Službene novine Kantona Sarajevo", br. 1/96, 2/96-Ispravka, 3/96-Ispravka, 16/97, 14/00, 4/01 i 28/04) i čl. 7. i 30. Zakona o pravima branilaca i članova njihovih porodica ("Službene novine Federacije Bosne i Hercegovine", br. 33/04, 56/05-Ispravka, 70/07 i 9/10) Skupština Kantona Sarajevo, na sjednici održanoj dana _____ 2011.godine, donijela je

**ZAKON
O DOPUNI ZAKONA O DOPUNSKIM PRAVIMA
BORACA-BRANITELJA BOSNE I HERCEGOVINE**

Član 1.

Iza člana 64. Zakona o dopunskim pravima boraca-branitelja Bosne i Hercegovine («Službene novine Kantona Sarajevo», broj 9/07 –Prečišćeni tekst i br. 7/08, 33/08 i 3/12), dodaje se novi član 64a. koji glasi:

„Član 64a.

(1) U svim postupcima koji se vode za priznavanje prava iz člana 5. ovog Zakona, prilikom obrade ličnih podataka podnosioca zahtjeva i unošenje u elektronsku bazu podataka ostvarenih prava po ovom Zakonu, mogu se bez prethodnih saglasnosti nosioca podataka objavljivati lični podaci, a u skladu sa članom 6. stav (1). tačka a) Zakona o zaštiti ličnih podataka („ Službeni glasnik Bosne i Hercegovine“, br. 49/06 i 76/11).

(2) Voditelji postupaka iz člana 64. ovog Zakona, kao i fondovi nad kojima Ministarstvo vrši nadzor nad zakonitošću rada, u cilju transparentnosti rada i ostvarivanja demokratskog procesa u skladu sa kojim su dužni postupati javni organi na cijeloj teritoriji Bosne i Hercegovine, mogu vršiti objavu lista lica koja su ostvarila pravo po ovom Zakonu sa ličnim podacima i odobrenim iznosima na službenoj internet stranici Ministarstva, u dnevnim novinama, na oglašnim pločama Kantona, info-punktu Ministarstva, sjedištima kantonalnih boračkih udruženja i službama za boračko-invalidsku zaštitu svih općina Kantona.

Član 2.

Ovlašćuje se Zakonodavno-pravna komisija Skupštine Kantona Sarajevo da utvrdi Novi prečišćeni tekst Zakona o dopunskim pravima boraca-branitelja Bosne i Hercegovine.

Član 3.

Ovaj zakon stupa na snagu osmog dana od dana objavljivanja u "Službenim novinama Kantona Sarajevo".

Predsjedavajuća
Skupštine Kantona Sarajevo
Prof.dr. Mirjana Malić

Broj:

Sarajevo,

OBRAZLOŽENJE

I – PRAVNI OSNOV

Pravni osnov za donošenje Zakona o izmjenama i dopunama Zakona o dopunskim pravima boraca-branitelja Bosne i Hercegovine sadržan je u odredbama člana 18. stav 1. tačka b) u vezi sa čl. 12, 13. i 14. Ustava Kantona Sarajevo («Službene novine Kantona Sarajevo», br. 1/96, 2/96, 3/96, 16/97, 14/00, 4/01 i 28/04), te odredbama čl. 7. i 30. Zakona o pravima branilaca i članova njihovih porodica («Službene novine Federacije Bosne i Hercegovine», br. 33/04, 56/05-Ispravka, 70/07 i 9/10).

II – RAZLOZI ZA DONOŠENJE

Rješenjem Agencije za zaštitu ličnih/osobnih podataka u Bosni i Hercegovini broj: UP1 03-1-37-7-4/12 od 08.02.2012.godine, Ministarstvu za boračka pitanja Kantona Sarajevo:

- I. Zabranjuje se da na službenoj internet stranici Ministarstva www.mbp.ks.gov.ba, u dnevnim novinama, na oglašnim pločama Kantona, info – punktu Ministarstva, sjedištima kantonalnih boračkih udruženja i službama za boračko – invalidsku zaštitu svih općina Kantona objavljuje lične podatke lica u postupku ostvarivanja prava propisanih članom 5. Zakona o dopunskim pravima boraca – branitelja Bosne i Hecegovine.
- II. Zabranjuje se obrada ličnog podatka JMB prilikom podnošenja zahtjeva za ostvarivanje prava propisanih članom 5. Zakona o dopunskim pravima boraca – branitelja BiH.
- III. Nalaže se Ministarstvu za boračka pitanja Kantona Sarajevo blokiranje i brisanje sa službene internet stranice www.mbp.ks.gov.ba do sada objavljenih ličnih podataka lica u postupku ostvarivanja prava propisanih članom 5. Zakona o dopunskim pravima boraca – branitelja BiH, blokiranje, brisanje i uništavanje do sada prikupljenih JMB podnosioca zahtjeva u postupku ostvarivanja propisanih prava i uništavanje do sada objavljenih listi na oglašnim pločama Kantona, info – punktu Ministarstva, sjedištima kantonalnih boračkih udruženja i službama za boračko-invalidsku zaštitu svih općina Kantona, a koje sadrže lične podatke lica u postupku ostvarivanja prava propisanim članom 5. Zakona o dopunskim pravima boraca – branitelja BiH.

Kako se gore navedenim rješenjem onemogućava normalan rad Ministarstva za boračka pitanja i vođenje postupaka ostvarivanja prava u skladu sa članom 5. zakona o dopunskim pravima boraca – branitelja BiH, pristupilo se dopuni važećeg Zakona po HITNOM postupku (član 153. Poslovnika Skupštine Kantona Sarajevo).

Obzirom da realizacijom rješenja Agencije za zaštitu ličnih/osobnih podataka u Bosni i Hecegovini neće moći pristupiti realizaciji pojedinih prava, a naročito onih za koje prvostepeni postupak za ostvarivanje isith vodi ovo Ministarstvo, ovaj tekst dopuna Zakona dat je u proceduru po HITNOM postupku, kako bi se izbjegle štetne posljedice za pripadnike boračke populacije sa područja Kantona Sarajevo.

Postupajući u skladu sa članom 6. stav (1). tačka a) Zakona o zaštiti ličnih podataka („Službeni glasnik Bosne i Hercegovine“, br. 49/06 i 76/11), a u cilju transparentnosti rada i ostvarivanja demokratskog procesa u skladu sa kojim su dužni postupati javni organi na cijeloj teritoriji Bosne i Hercegovine, Ministarstvo je u Prijedlogu Zakona o dopuni Zakona o dopunskim pravima boraca – branitelja BiH propisalo da se u svim postupcima za priznavanje prava iz člana 5. ovog Zakona dozvoljava obrada ličnih podataka podnosioca zahtjeva, unošenje u elektronsku bazu podataka, i objava lista lica koja su ostvarila prava po ovom Zakonu sa ličnim podacima i odobrenim iznosima na službenoj internet stranici Ministarstva, u dnevnim novinama, na oglašnim pločama Kantona, info-punktu Ministarstva, sjedištima

kantonalnih boračkih udruženja i službama za boračko-invalidsku zaštitu svih općina Kantona.

Prijedlogom ovog teksta Zakona ispunjen je jedan od uvjeta iz člana 6. Zakona o zaštiti ličnih podataka čime Ministarstvo kao kontrolor može obrađivati lične podatke podnosioca zahtjeva bez saglasnosti nosioca podataka.

III - USKLAĐENOST SA LEGISLATIVOM EVROPSKE UNIJE

Ministarstvo pravde i uprave Kantona Sarajevo izjasnilo se da tekst Prijedloga ovog zakona je usaglašen sa Konvencijom o zaštiti ljudskih prava i osnovnih sloboda i drugim pravnim aktima kojima je utvrđena zaštita ljudskih prava i sloboda.

IV - OBJAŠNJENJE PRAVNIH RJEŠENJA SADRŽANIH U ZAKONU

U članu 1. ovog Prijedloga iza člana 64. dodaje se novi član 64a. kojim se propisuje da se prilikom priznavanja prava iz člana 5. ovog Zakona mogu bez prethodne saglasnosti nosioca podataka obrađivati i objavljivati lični podaci, a u skladu sa članom 6.stav 1 tačka a) Zakona o zaštiti ličnih podataka. Također se dozvoljava i unošenje ličnih podataka u elektronsku bazu.

U članu 2. ovlašćuje se Zakonodavno-pravna komisija Skupštine Kantona Sarajevo da utvrdi Novi prečišćen tekst ovog zakona.

Članom 3. određuje se datum stupanja na snagu ovog zakona.

FINANSIJSKA SREDSTVA

Predlaže se da Skupština Kantona Sarajevo prijedlog ovog zakona donese iz razloga da se utvrđena prava mogu implementirati, jer su novčana sredstva za ista obezbjeđena u Budžetu za 2012. godinu, a za realizaciju ovog Prijedloga nisu potrebna dodatna budžetska sredstva.

PRILOZI:

1. Rješenje Agencije za zaštitu ličnih/osobnih podataka u Bosni i Hercegovini broj: UP1 03-1-37-7-4/12 od 08.02.2012.godine
2. Izvod iz Zakona o pravima branilaca i članova njihovih porodica („Službene novine Federacije BiH“, br.33/04, 56/05, 70/07 i 9/10)
3. Zakon o dopunskim pravima boraca-branitelja Bosne i Hercegovine („Službene novine Kantona Sarajevo“, br.9/07-Prečišćeni tekst, 7/08, 33/08 i 3/12)
4. Izvod iz Zakona o zaštiti ličnih podataka („ Službeni glasnik Bosne i Hercegovine“, br. 49/06 i 76/11)

POP RATNA DOKUMENTACIJA